

AUGLÝSING

um staðfestingu á breytingu á áður staðfestu aðalskipulagi Garðabæjar 1985–2005.

Samkvæmt skipulagslögum nr. 19, frá 21. maí 1964 hefur ráðuneytið hinn 26. september 1990 staðfest uppdrátt er sýnir breytingu á áður staðfestu aðalskipulagi Garðabæjar, 12. maí 1987.

Breytingin tekur til landnotkunar á hluta óbyggðs svæðis merktu F-3 í Urriðavatnsdölum sem verður nú opið svæði frátekið fyrir golfvöll merkt ÍP-5.

Uppdráttur þessi hefur hlotið þá meðferð, sem skipulagslög nr. 19/1964 mæla fyrir um. Bæjarstjórn Garðabæjar hefur samþykkt hann og skipulagsstjórn ríkisins afgreitt hann til staðfestingar ráðherra.

Félagsmálaráðuneytið, 28. september 1990.

F. h. r.

Húnbogi Þorsteinsson.

Hólmfríður Snæbjörnsdóttir.

SKIPULAGSSKRÁ

fyrir Endurhæfingarstöð hjarta- og lungnasjúklinga á Akureyri.

1. gr.

Stofnunin er sjálfseignarstofnun og heitir: Endurhæfingarstöð hjarta- og lungnasjúklinga á Akureyri.

Stofnendur eru Landssamtök hjartasjúklinga, Hjarta- og æðaverndarfélag Akureyrar og nágrennis og Samband ísl. berkla- og brjóstholssjúklinga (SÍBS).

2. gr.

Stofnfé eru eftirtalin framlög stofnenda, og skal það haldast óskert.

Kr.

Landssamtök hjartasjúklinga 122 000,00

Hjarta- og æðaverndarfélag Akureyrar og nágrennis 122 000,00

Samband ísl. berkla- og brjóstholssjúklinga 122 000,00

Stofnendur bera engar fjárhagslegar skuldbindingar vegna stofnunarinnar aðrar en stofnfé skv. framangreindu.

3. gr.

Heimili og varnarþing er á Akureyri.

4. gr.

Markmið og hlutverk stofnunarinnar er að veita hjarta- og lungnasjúklingum eftirfarandi þjónustu:

- Endurhæfingu í beinu framhaldi af dvöl á sjúkrahúsi og/eða Vinnuheimilinu á Reykjalundi skv. tilvísun lækna.
- Almenna framhaldsendurhæfingu, þar sem fyrrverandi sjúklingum gefst kostur á viðhaldsþjálfun skv. æfingakerfum í samræmi við getu þeirra.
- Ráðgjafar- og upplýsingaþjónusta um hjarta- og lungnasjúkdóma svo og lífnaðarhætti, mataræði, réttindi sjúklinga og fl.

5. gr.

Tekjustofnar stofnunarinnar eru:

- a) Þóknun fyrir þjónustu þá, sem nefnd er í 4. grein.
- b) Gjafir og styrktarfé frá stofnendum.
- c) Önnur framlög, sem veitt er viðtöku eða aflað.
- d) Vextir af stofnfé.

6. gr.

Fulltrúaráð stofnunarinnar skipa 15 menn og eru þeir þannig valdir: Stofnaðilar tilnefna hver fyrir sig þrjá menn og einn til vara, til tveggja ára í senn. Stjórnun Fjórðungssjúkrahússins og Heilsugæslustöðvarinnar á Akureyri skal boðið að tilnefna einn mann hvorum til setu í ráðinu til 2ja ára í senn. Sjúkrasjóðum verkalýðsfélaganna á Akureyri skal boðið að tilnefna úr sínum hópi 3 menn til setu í ráðinu til 2ja ára í senn. Starfsmannafélagi Akureyrar STAK, skal boðið að tilnefna einn mann til setu í ráðinu til tveggja ára í senn.

7. gr.

Fulltrúaráðið kýs sér formann til tveggja ára í senn. Hann boðar fundi í því og stjórnar þeim. Boða skal til funda á sannanlegan hátt með viku fyrirvara. Varamenn skal boða til funda, ef um kunn forföll aðalmanna er að ræða.

Fundir eru lögmætir ef minnst helmingur fulltrúa mætir. Afl atkvæða ræður úrslitum við afgreiðslu mála á fundum ráðsins. Framkvæmdastjórnarmenn eiga sæti á fundum fulltrúaráðsins með málfrelsi og tillögurétt.

Fulltrúaráðið skal hafa eftirlit með því að framkvæmdastjórn stofnunarinnar starfi samkvæmt lögum og í samræmi við skipulagsskrá þessa. Það getur sett almennar reglur um starfstilhögun og rekstur stofnunarinnar innan ramma skipulagsskrár þessarar.

Veita skal ráðinu aðgang að skjölum og gögnum varðandi rekstur stofnunarinnar.

8. gr.

Aðalfund fulltrúaráðs skal halda fyrir 31. maí ár hvert.

Á aðalfundi skal taka fyrir eftirfarandi mál:

- a) Skýrslu framkvæmdastjórnar um starfsemi.
- b) Endurskoðaða reikninga stofnunarinnar, sem stjórnin leggur fram.
- c) Kosningu framkvæmdastjórnar og varamanna til þriggja ára í senn, ef ráðið óskar þess. Aukafund skal halda þegar framkvæmdastjórnin óskar þess eða fimm fulltrúar hið fæsta.

9. gr.

Fulltrúaráð kýs hlutbundinni kosningu framkvæmdastjórn stofnunarinnar, sem skal skipuð þremur mönnum og þremur til vara. Má enginn þeirra vera jafnframt í fulltrúaráðinu.

Fulltrúaráðið kýs formann stjórnarinnar sérstaklega. Stjórnin skiptir að öðru leyti með sér störfum. Varamenn skal jafnan boða á fundi stjórnarinnar og taka þeir sæti í forföllum aðalmanna. Stjórnin er ályktunarfær, ef meirihluti hennar mætir.

Gerðabók skal haldin á stjórnarfundum.

10. gr.

Framkvæmdastjórn ber að starfa samkvæmt skipulagsskrá þessari og lögum nr. 19 frá 1988. Verkefni hennar er:

- a) Að stjórna stofnuninni í samræmi við almennar reglur fulltrúaráðsins, sbr. 7. gr.
- b) Að ráða starfsfók og segja því upp, ákvarða laun þess og önnur starfskjör.
- c) Að veita prókúru.
- d) Að sjá um fjármál og annast framkvæmdir.

- e) Að sjá um reikningshald og reikningsskil og ráða löggiltan endurskoðanda reikninga stofnunarinnar.
- f) Að fara með öll önnur störf, sem eðlilegt eða nauðsynlegt er að taka ákvarðanir um eða framkvæma á vegum stofnunarinnar.

11. gr.

Breyta má skipulagsskrá þessari, ef meirihluti fulltrúaráðs samþykkir það á aðalfundi. Leita skal samþykkis dómsmálaráðherra á breytingunni.

Heimilt er að leggja stofnunina niður, ef meirihluti fulltrúaráðs tekur ákvörðun um það á fundi, sem boðaður hefur verið um það mál. Leita skal samþykkis dómsmálaráðherra fyrir því.

Eignum stofnunarinnar skal þá varið til starfsemi í þágu hjarta- og lungnasjúklinga eftir ákvörðun meirihluta fulltrúaráðsins.

12. gr.

Leita skal staðfestingar dómsmálaráðherra á skipulagsskrá þessari.

Skipulagsskrá þessi staðfestist hér með samkvæmt lögum um sjóði og stofnanir sem starfa samkvæmt staðfestri skipulagsskrá, nr. 19/1988.

Dóms- og kirkjumálaráðuneytið, 27. september 1990.

F. h. r.

Þorsteinn Geirsson.

Fanney Óskarsdóttir.

SKIPULAGSSKRÁ

fyrir Minningarsjóð Jónasar Sigurbjörnssonar.

1. gr.

Sjóðurinn heitir Minningarsjóður Jónasar Sigurbjörnssonar. Hann er stofnaður af vinum og vandamönnum til minningar um Jónas Sigurbjörnsson, Sunnuhlíð 4, 603 Akureyri. Jónas var fæddur 24. ágúst 1950 og lést 7. júlí 1989.

2. gr.

Stofnfé sjóðsins er framlag Samherja hf. og Ísbergs ltd. að fjárhæð kr. 365.000. Stofnfé má ekki skerða.

3. gr.

Tilgangur sjóðsins er að vera til styrktar skíðamönnum á Akureyri, svo sem með því að styrkja þá til náms í íþrótt sinni eða útvega þeim kennslu eða námsaðstöðu. Skal stjórn sjóðsins heimilt að veita til þessa fé úr sjóðnum samkvæmt ákvæðum 5. gr. þegar henni þykir ástæða til og er æskilegt að umsóknir um styrkveitingu berist fyrir 1. desember og 1. apríl ár hvert.

4. gr.

Tekjur sjóðsins eru:

- a) vextir af fé hans,
- b) árleg framlög og aðrar tekjur.

5. gr.

Stjórn sjóðsins er heimilt að veita á hverjum tíma þá upphæð sem hún telur sér fært að veita án þess að rýra stofnfé sjóðsins.